



Il gioco del Truc nel 1930



IL TRUC

**Timp di Pasche! Nostalgie
de lontane mularie
quant che 'o vevin tant ce fà:
'l ere il truc di preparà.**

**'O ricuardi: dopo scuele
cu la pale e la barele
vie di corsa in Nadisón
a ciarià il savalón.**

**Dopo vê sielzût il lûc,
prin si dave forme al truc
cun modons e grums di clàs,
cu la glerie e i rudinàs.**

**Sul telâr cussi prontât
el vignive distirât,
come un slis e larc bleón,
il cuviârt di savalón.**

**Si finive po' la vøre
cun tun cop mitût parsøre,
là dulà scomenze il zûc,
e prontât al jere il truc.**

**Il dì dopo, duc' intôr,
ogni ûf un zuiadôr.
Us a riis, ûs vers, ûs viola,
coloràs cu la cevola.**

**O ce gionde, o ce biel zûc
quant che l'ûf faseve tûc.
Ma 'e finive bruntulànt
se jù al leve blestemànt.**

**Altris timps! I fruz, si sà,
uè 'e àn altri a ce pensà;
lor 'e àn zûcs a badaluc
'e no pensin di fà il truc.**

Luciano Bosio

